

## **Luosâpivdo meriáigásii kieldimist Tiänujuuvâst adelemnáál laavâ vuáimánpuáttim maŋŋaan – ministeriö kiäsá kuálásteijeid**

**Ovdâskodde tuhhiittij tievâscuákkim nube kiedâvušmist 31. vyesimáánu luosâpivdo meriáigásii kieldimân Tiänujuuvâst kyeskee lahâiävtuttâs. Cuáŋuimáánust haldâttâs iävtuttâs addeldijn árvuštâlli, ete laahâ puávtâččij puáttiđ vuáimán kesimáánu 1. peeivi. Taan tove áarvu mield laahâ kiergâničij puáttiđ vuáimán kuittâg eskân 7.6.2022.**

Laavâ vuáimánpuáttim maŋŋanem joođeet toos, ete luosâpivdokiäldun kyeskee miärâdâsah iä lah vala vyeimist kuálástuspaje aalgâst 1. kesimáánu. Tondiet eennâm- já meccituáluministeriö kiäsá kuálásteijeid Tiänu luosânaalij suojâlem tiet. Tiänu luosânhäähil láá hiäjusmâm vuáimálávt já áárvui mield puoh luosâpivdo ličij lijgekuálâstus tääl. Meerâst juuvâ kulij mäccee luosâmeeri lii nuuvt uccâ, ete kilelis kuálâstus vuolgâsajeh iä oláshuu, veikâ iä kuálâstiččii ollágín. Ministeriö tuáivu, ete ulmuuh iberdiččii tile tuođâlâšvuodâ já veikâ luosâpivdokiäldun kyeskee laahâ ij lah vala vyeimist, te iä tast peerusthánnáá tátulávt vuálgâččii pivdeđ luosâ.

Eennâm- já meccituáluministeriö tiäddut Suomâ já Taažâ koskâsijn ráđadâlmijn Tiänujuuvâ kuálástuspaje 2022 kuálâstusrâijiittâsâin juksu loppâpuáttus. Taažâin soppum nubâstusah Tiänujuuvâ kuálâstusmiärâdâssâid, moh kyeskih eres šlaajáid ko luosân, pottii vuáimán staatârääđi asâttâssâin 6.5.2022. Asâttâssâin vuáimánpuohtum pevdikirje mield kuálâastmist suovvum pivdopiergâseh láá eres ko luosâ já merâráávdu piividon uáivildum piergâseh. Staatâi kooskâst soppum luosâpivdokiäldun kyeskee miärâdâsâid kalga toi vijđesvuodâ tiet olášuttiđ Suomâbeln laavâ tääsist ige keppisub raijiittâsâin aanoost orroo staatârääđi asâttâs peht. Lavvâin kieldih luosâpivdo já luosâpiividon uáivildum piergâsij kevttim Tiänujuuvâ čácâduvâst ive 2022, väi Tiänu luosânaalij vuáimálâš hiäjusmem puávtâččii orostittiđ sehe puávtâččii olášuttiđ hinnáid luosânaalij iälâáskmâń já kilelis táásán pyehtimâń. Taažâst luosâpivdokiäldu lii jo puáttám vuáimán.

Toos lasseen eennâm- já meccituáluministeriö haalijd muštottiđ meid kuálâstusâń lohtâseijee pirâsovđâsvâstâdâs merhâšuumeeest, mii luávdá ovđâsvâstâdâs luándust já ton maangâhámásâšvuodâst, pirrâsist já kulttuurâerbist. Pirrâs kilelis kiävtu prinsiipiij olášutmist kalga väldiđ vuogâlâvt huámmâšumán meid puáttee suhâpuolvâi máhđulâšvuodâid kuálâstusâń.

### **Lasetiäđuh eennâm- já meccituáluministeriöst:**

Vesa Ruusila, pivdotuáluräđiolmooš, p. 02951 62051, vesa.ruusila(at)gov.fi

Tapio Hakaste, ráđadâlle virgeolmooš, p. 02951 62152, tapio.hakaste(at)gov.fi